

Makitu ki Pol ndangi adi Pilipi'gi Ta ki do makitu'ti ki Pol ndangi adi Pilipi'gi

Njekawnan ki Pilipi'ti ə in njekawnan ki dokete ki Pol ndə ginn'de donangi Eropi'ti. Pol ndangi makitu kin adi'de kagilo'ti ki in dangay'ti. Njekawkulə Pol elta do nya'gi'ti ki tei do'a'ti kagilo ki isi'n ki do'ne ta ne kin ningə təl ra oyo njekawnan'gi tado ra ki rai si'ə ki nyamaji'gi ki ji'de'ti. Ta lə k'in kare ki kisimaji lə Njekawnan'gi uwə me Pol tado njendo nya ki ngom yəki Njekawnan'gi. De'gi ki uni me'de adi Jeju Kirisiti ingəi kisikidətaa ki sigi ki rə Luwə'ti. Kisikidətaa ki sigi kin utə nya'gi ki rangi pəti. Re njekunme'gi sii dann kagilo'ti ki ngan mindi kaa, kisikidətaa kin adi'de lapiya ki ronel. Ginn'ə kin ə njekawkulə, re in dangay'ti kaa, ra tōgi ndangi'n makitu adi njekawnan ki Pilipi'ti el'de kon ta kin ene: «Rai ronel ki ndo'gi ndo'gi me Burəbe'ti» (4.4).

Kon ta'gi ki me'ti: Kandi me ta'ti 1: 1-11. Nya'gi ki tei do Pol'ti inbe 1.12-26. Kirisiti in nyandaji lə njekunme'gi 1.27-2.18. Ta ki do Timote'ti ki Epapirodit 2.19-30. Kirisiti ə asi pəti um ndukun lə Moji el 3.1-4.9. Ra oyo tado ra ki nan ki nyamaji ki ji'ti 4.10-23.

Kuwə ji nan

¹ In m'in Pol, nan'ti ki Timote, j'in njekuləbər'gi lə Jeju Kirisiti ə ji ndangi makitu kin j'adi'se in de'gi lə Luwə ki me kində rə nan'ti me tə Kirisiti'ti, ki sii Pilipi'ti*. Makitu kin sow do'se, ingi ki njekornon'se'gi, ki diyakirə'gi. ² Ningə kadi memaji ki kisimaji lə Baw'je Luwə ingi ki Burəbe lə'je Jeju Kirisiti in nan'ti sese.

Pol elta ki Luwə tado lə njekunme'gi ki Pilipi'ti

³ Dəkagilo'gi pəti ki me'm olo do'se'ti ə, m'ra oyo Luwə. ⁴ Taa dəkagilo'gi pəti ki kadi m'el'n ta ki Luwə tado lə'se pəti ə, m'el si'ə ki rənel tə. ⁵ Rənel lə'm in tado ra ki rai sə'm me kulə kiləmbər Poyta'ti ki maji, lo kulə ngirə'ti nu bitə bone†. ⁶ M'gər maji kadi Luwə ki ində ngirə kulə ki maji me'se'ti kin, a awi'n bitə ta tolta'a'ti, ndə təl Jeju Kirisiti'ti. ⁷ In gorow'ə'ti kadi m'aw ki mərta ki be kin tado lə'se pəti, tado m'ində'se dann me'm'ti. Ingi, indəi rə'se nan'ti sə'm do maji'ti ki Luwə ra sə'm. Indəi rə'se nan'ti sə'm pəti me k'in'm dangay'ti, ki me rə'ti ki m'ro ki togi'm tado Poyta ki maji‡. ⁸ Luwə asi kadi mannaji lə'm toki, ingi pəti m'ndigi'se ndigi lə Jeju Kirisiti, m'or mann do'ti soti.

⁹ Nga ningə, nya ki m'dəji Luwə, in kadi ndiginan lə'se in ki do mad'a'ti do mad'a'ti, nan'ti ki nya gər ki rəta'ti ki me kər kum nya ki maji ki nya ki majel nan'ti kadi ar njay. ¹⁰ Lo kin'ti, a gəri go nya ki nda'a to'ti ki maji ra. Ə a in de'gi ki kar njay, ki ndə təl Kirisiti'ti, de asi kadi aw ki ta madi do'se'ti el. ¹¹ Ningə a in de'gi ki

* **1:1** 1.1 4.15; KNK 16.12 † **1:5** 1.5 KNK 16.13-15 ‡ **1:7** 1.7 1.13

nyara ki dana, ki in rɔ Kirisiti'ti a to mbar mbar rɔ'se'ti, tado tɔɔbar ki tɔji lɔ Luwə.

Poyta ki maji aw ki kete kete

¹² Ngannkon'm'gi, m'ndigi kadi in gəri toki nya ki te dɔ'm'ti kin ra adi Poyta ki maji aw ki kete to kaw yo. ¹³ In be ə, de'gi pəti ki nje ra kulə ki nje konbe ki boi, ki ndəgi de'gi, gəri kadi in tado kulə lɔ Kirisiti ə m'to'n dangay'ti. ¹⁴ Nga ningə, to'm dangay'ti, ra adi ngannkon'm'gi ngayn, uni me'de adi Burəbe, ə ingəi tɔgi dɔ mad'a'ti kadi elita lɔ Luwə ki kanji ɓol. ¹⁵ In ki rɔta'ti kadi de'gi madi iləimbər tɔ Kirisiti ki hal ta ki ra, ki hangal n'in, nan de'gi ki nan'gi, iləimbər'ə ki hangal ki maji tɔ. ¹⁶ De'gi ki awi ki hangal ki maji kin, rai kulə kin ki ndiginan. Ningə gəri kadi m'in lo kin'ti ne, m'nji m'rɔ tado Poyta ki maji. ¹⁷ Nje ki awi ki hal ta ki ra, isi iləimbər tɔ Kirisiti ki ndigi ra ki sɔw dɔ'de. Ningə nya ki me'de'ti ki ɔsi'de adi isi iləimbər tɔ Kirisiti kin in nya ki dana el. Sangi kadi n'adi m'in kon dɔ mad'a'ti, me dangay'ti ki m'in'ti. ¹⁸ Ningə re in ki me ki maji eke in ki majel ə isi iləimbər tɔ Kirisiti ə, in kin de aw go'ti el. M'gər kadi isi iləimbər tɔ Kirisiti, ningə m'ra rɔnel dɔ'ti, ə m'nanyi ki lo ra rɔnel dɔ'ti. ¹⁹ Tado m'gər kadi in nya ki isi ra nya kadi ta tɔl ta'a ə m'ingə'n kaji. M'ingə'n kaji ki takul k'el ki isi elita ki Luwə tado lə'm num, ki takul tɔgi ki Ndil Jeju Kirisiti adi m num. ²⁰ Ki ɔji go nya ki m'nji m'ngəm ta'a ɔle, ki m'nji m'ində me'm dɔ'ti, nya ki rɔ'm a sɔl'm dɔ'ti goto. M'tinyi me'm kati kadi re in ɓone eke ndɔ'gi pəti, m'a m'tɔji k'in kibo lɔ Kirisiti kadi

de'gi oyi daro'm'ti. Re in me kisidotaa'ti la'm eke me koy'm'ti. ²¹ Ki daro'm'ti, kisikidotaa la'm in tado Kirisiti, e koy'm in maji la'm to. ²² Ningə, re kisi'm ki do'm taa bay, a adi'm tarow kadi m'ra kulə madi ki to soti ə, lo kin'ti, m'gər nya ki kadi m'mbəti el, ke in kisikidotaa eke in koy wa kaa m'gər el. ²³ Nan nya'gi joo isi ndori'm'in yanan: m'ndigi kadi m'tusi donangi kin m'inyə, e m'aw m'nji kadi Kirisiti'ti. In kin e in nya ki to soti ngayn. ²⁴ Ningə kisi'm donangi'ti ne, maj'a to'ti ngayn tado la'se. ²⁵ Nga ningə, m'gər maji, ujə'm roy kadi m'a m'nji donangi'ti ne bay, m'a m'in kadi'se'ti ne pəti bay tado kaw kete la'se, tado ronel la'se me kunme'ti. ²⁶ Lo kin'ti, loki m'təl m'te dann'se'ti ə, ki takul'm, a gəri row toji ki isi me to Kirisiti'ti kin ar njay.

²⁷ Nan k'in ə, kadi panjiyə'se in kigo Poyta'ti ki maji la Kirisiti, kadi re m're dann'se'ti, eke m'in sanyi sese kaa, m'oo ta ki do'se'ti maji. Kadi m'oo poy'se toki uwəi togi'se ba me ndil'ti ki kare, indəi ro'se nan'ti, ro'i ki me ki kare kigo me'se'ti ki uni adi do Poyta'ti ki maji. ²⁸ Ningə inyəi tarow adi njeta'gi la'se uləi bol kare me'se'ti el. Loki inyəi tarow adi uləi bol me'se'ti el, a to taga kadi in de'gi ki uni row ki kaw tuji'ti, e ingi, uni row kaji to. Ningə pəti, in ndigi la Luwə kadi to to be. ²⁹ Tado ki ojido Kirisiti, Luwə ra sese maji adi uni me'se adi'ə par el, nan adi ingəi kon tado li'ə to. ³⁰ Ningə ki ngosine kin, ingi uləi ro'se me ro'ti ki kete m'nji m'ro kakin to. Ro kin, bone ge kin kaa m'nji ta'ti

ne m'nji m'ro toki in gəriŞ.

2

Kirisiti təl rō'ne njekuləbər'ti

¹ Toki ka ki Kirisiti ulə'n dingəm me'se'ti, toki ingəi tōgi me ndigi nan'ti, toki Ndil dō'n'se nan'ti, toki me'se to'n dō nan'ti, isi oji k'oo kumtondoo lə'se ki rō nan'ti, ² m'dəji'se kadi adi'm'in ronel me kuwə nan me'se'ti lə'se kin. Adi ndiginan ki kare inbe kin ə uwə me'se, adi me'se in kare, indəi rō'se nan'ti. ³ Rai nya madi kare ki hal ni ki ra el, taa hal kōji rō el tō. Nan ki dō ki səl ləm, kadi de ki nungi oo madi'ne to kibo dō'ne'ti. ⁴ Kadi de madi sangi maji lə rō'ne inbe par el, nan kadi sangi maji lə ndəgə'gi tō taa. ⁵ Kadi panjiyə'se ki rō nan'ti in panjiyə de'gi ki nje kində rō'de nan'ti me tō Kirisiti.

⁶ Kirisiti ki, lo kulə ngirə'ti nu, re oo nya'gi ki rō'a'ti pəti ə, in Luwə inbe par, nan sangi kadi n'uwə majirō'ne ki ji kası ki asi nan ki Luwə kin el.

⁷ Or tōbar kin dō'ne'ti kō to k'or yo,

Ra rō'ne njekuləbər'ti,

Təl rō'ne to de'ti,

Adi de'gi gəri'ə me nya'gi'ti pəti toki in de.

⁸ Səl dō'ne,

Təl rō'ne go ta'ti bitı oy'n,

Koy ki dō kagidəsi'ti.

⁹ In tadō kin ə, Luwə un dō'a taa ad'a ra ngaw,

Ad'a tō ki in dō tō'gi'ti pəti.

¹⁰ Tadō kunme me tō Jeju'ti,

Nyakində'gi pəti ki dɔran'ti,
 Dɔnangi'ti ki ginn dɔnangi'ti
 Ɔsi məkəsi'de nanga non'a'ti,
 11 Ə kadi ta te ta de'gi'ti pəti toki Jeju Kirisiti in
 Burəbe,
 Kadi to Luwə ki Baw'je bari'n*.

Kulə lə njekunme'gi dɔnangi'ti ne

12 Njendigi'm'gi ki maji, to ki ka ki rai go
 ndu'm'ti ki ndo'gi ndo'gi, dɔkagilo ki m'in'n
 dann'se'ti, kadi rai ki dɔkagilo ki oyi m'in
 dann'se'ti par el, nan dɔkagilo ki m'goto'n
 dann'se'ti ne inbe kin kaa, kadi rai kulə dɔ kaji'ti
 lə'se ki bol Luwə, ki dɔ ki sol. 13 Tado Luwə
 inbe ə ində ndigira me'se'ti num, ɔsi'se adi rai
 num, kigo kɔjira'ti li'ə. 14 Rai nya'gi pəti ki kanji
 barta ki kanji kɔl, 15 kadi ta madi goto dɔ'se'ti,
 kadi in de'gi ki kar njay, kadi in ngann'gi lə
 Luwə ki inyəi adi nya ki majel kare be ka rati
 rɔ'je'ti el, dann de'gi'ti ki uri mu sulə ki, de'gi
 ki ndigi kuləra ki majel par, ki me dɔnangi'ti ne.
 Kadi unji dann'de'ti to por ki unji dɔ dɔnangi'ti†,
 16 loki a iləi'de mbər ta kaji. Lo kin'ti, m'a
 m'un'se kadi m'ində'n gu'm, ndo təl Kirisiti'ti.
 Tado m'anyi ngodi ki rɔ'm to'm ki ndangi kare
 el. 17 Re kadi mosi'm osi nanga dɔ kulə'ti ki m'ra,
 kadi ki m'un'n kunme lə'se to kadikare m'adi
 Luwə ə, m'ra rɔnel, ningə kadi rɔnel lə'm kin in
 rɔnel lə'se pəti. 18 Ningə ingi kaa, kadi rai rɔnel
 to, ə adi rɔnel lə'se in rɔnel lə'm to.

* 2:11 2.11 10-11; Ejay 45.23 † 2:15 2.15 Ndukun ki nja joo
 32.5

Pol ulə Timote ingi ki Epapiroditı ki rɔ njekunme'ti ki Pilipi

¹⁹ M'gər dɔ'm'ti maji kadi me tɔ Burəbe Jēju'ti, nanyi ngayn el kadi m'a m'ulə ki Timote rɔ'se'ti non kadi re ki poy'se adi'm kadi m'in kaa m'ingə'n tɔgi tɔ. ²⁰ Timote ki kar'ne ba ə kanyi sə'm ta ki uwə me'm, adi ta on me'ə ə isi mərta dɔ'se'ti. ²¹ Ndəgə'gi pəti, kanyi ngodi tado maji lə rɔ'de inbe par ə uwə me'de, um ngodi lə Jēju Kirisiti el. ²² Nan in, tɔji ki taga adi de'gi gəri'ə to ngonni ki nje njiyə nja baw'ne'ti. Ində rɔ'ne ta kulə kiləmbər Poyta'ti ki maji sə'm. ²³ M'gər kadi in ə m'a m'ulə ki rɔ'se'ti loki m'a m'oo ta ki dɔ'm'ti ar njay. ²⁴ Taa m'gər dɔ'm'ti maji, kadi me tɔ Burəbe'ti, dəkagilo ngayn el ə, darɔ'm m'inbe, m'a m're kadi m'oo'se.

²⁵ Ningə ki ngɔsine kin, m'oo maji ngayn kadi m'təl m'ulə ngonni'je Epapiroditı, ki in madikulə'm ki madi rɔ lə'm rɔ'se'ti gogi. In ki uləi'ə kadi re ki nya'gi ki m'aw ndoo'ə, kadi ra sə'm‡. ²⁶ Epapiroditı ndigi ngayn kadi n'oo'se pəti, ningə sangi ki rɔ tinyi'ne, tado monyi ra'a, adi oyi ta'a. ²⁷ Monyi ra'a, ki koy'o in ndəkba, nan Luwə oo kumtondoo li'ə. Ningə in kumtondoo li'ə par el, nan in kumtondoo lə'm tɔ ə Luwə oo, kadi m'ingə metuji ki rangi dɔ mad'a'ti bay el. ²⁸ M'sangi kadi m'ulə rɔ'se'ti gogi kalangi, kadi re oyi'ə ə, ingəi rɔnel, ə kadi m'in kaa me'm osi'n ki nanga tɔ. ²⁹ Lo kin'ti, maji kadi uwəi'ə ki rɔ'se'ti ki rɔnel ngayn, me tɔ Burəbe'ti. Ko de'gi ki to in be kin, maji kadi ɔsigonn'de. ³⁰ Tado nanyi nden ba kadi ingə koy

‡ 2:25 2.25 4.18

tado kulə lə Kirisiti. Un rɔ'ne ilə kɔ, kadi re ra sə'm tor'se'ti, me nya'ti ki inbe'gi asi kadi rai adi'm'in el.

3

Row ki ra dana ki rɔta'ti non Luwə'ti

¹ Ki ngosine kin ngannkon'm'gi, maji kadi rai ronel me kində rɔ nan'ti ki Burəbe. Nya ki a ɔgi'm kadi m'təl m'el'se ko ta ki kare ki m'el'se kete nga kin goto. Ningə ki rɔ'se'ti ə, in nya ki maji sese to maji yo. ² Maji kadi indəi kumkədi dɔ rɔ'se'ti ki rɔ de'gi'ti ki rai rɔ'de to busi'gi be kam, ki rɔ de'gi'ti ki in nje ra kulə ki me'de ki majel, ki rɔ de'gi'ti ki nje k'oo mɔti ki kujə to nya ki ngayn. ³ Njekujəmɔti'de'gi ki rɔta'ti in j'ingi, tado j'isi ji gosi Luwə ki row lə Ndil'ə, rɔ'je nəl'je ngayn kadi j'ində rɔ'je nan'ti ki Jeju Kirisiti, ningə j'uwəi kul rɔ'je el tɔ. ⁴ Nan ki rɔta'ti, m'aw ki ta ki asi kadi m'uwə'n kul rɔ'm. Kin ə de madi oo kadi n'asi kuwə kul rɔ'ne ə, m'in m'asi kuwə kul rɔ'm m'utə de'ə kin. ⁵ Ujəi mɔti'm ndɔ ki kon jijoo lə ndɔ koji'm, m'in ngonn *Isirayel, ginn koji'ti lə Benjamin, m'in Ebirə ki me mosi'ti, ningə ki ɔjido ndukun, m'in me kuti'ti lə *Parisi'gi. ⁶ Ki ɔjido tingəbil, m'in njekində kum njekawnan'gi ndoo, ki ɔjido təl rɔ go ndukun'ti, m'in ki kanji ta madi dɔ'ti*. ⁷ Nga ningə, nya'gi kin ki kete m'oo'de to nya ki ngayn, ngosine m'oo'de to nya ki kɔ kare tado lə Kirisiti. ⁸ M'oo'de to nya ki kɔ kare, loki m'un'de m'ɔji kadi nyamaji'ti ki əti bol ki in gər ki m'gər Jeju Kirisiti ki Burəbe lə'm. Tado lə Kirisiti, m'inyə

* 3:6 3.6 KNK 8.3, 22.4, 26.9-11

nya'gi pəti kɔ, m'oo'de to nya ki dɔ yiwi be. M'ra be kadi m'in'n nan'ti ki Kirisiti, ⁹ kadi m'in me ji'ə'ti. Ningə kadi in ki takul ki ra wa m'ra dana me ndukun'ti el, nan kadi in ki takul kuləra Kirisiti. Kadi in ki takul kortadɔti ki Luwə ɔr ki gorow kunme kadi Kirisiti. ¹⁰ Nya ki uwə me'm, ində'n ta kadi m'gər Kirisiti, taa kadi m'gər tɔgi kin ki ində'n taa lo koy'ti. Ningə kadi m'ingə ko kon li'ə kin, ə kadi m'oy ko koy li'ə kin tɔ. ¹¹ Be kadi to re to bann ə, m'ində taa lo koy'ti, dann njekoy'gi'ti.

Kanyi ngodi sɔw dɔ nya ki j'isi j'anyi ngod'o

¹² Toki rɔta'ti, nya ki m'nji m'anyi ngodi tado'a kin, m'ində ji'm dɔ'ti el bay, taa m'in de ki gəsirə gəsirə el bay tɔ. M'nanyi ki lo kanyi ngodi'ti kadi m'ində ji'm dɔ'ti, tado m'inbe ki dɔ'm, Jeju Kirisiti ində ji'ne dɔ'm'ti. ¹³ Ngannkon'm'gi, m'gər kadi m'ində ji'm dɔ nya'ti ki m'nji m'anyi ngod'o kakin el bay, ningə nya kare ki m'ra, me'm oy dɔ nya'gi ki go'm'ti, m'ində tɔgi dɔ rɔ'm'ti kadi ji'm ɔdi nya ki in non'm'ti kin yo. ¹⁴ M'anyi ngodi sɔw dɔ nya ki in non'm'ti, kadi m'ingə nya kugəgoji ki Luwə bar'je kadi adi'je dɔran'ti ki gorow lə Kirisiti. ¹⁵ J'in ki ji tɔgi gangi me ndil'ti, maji kadi mərta lə'je ra nanga dɔ loki m'el ta'ti kin. Nga ningə, kin ə re nya madi to, ə ndu'se asi nan dɔ'ti el ningə, Luwə a te kum'se dɔ'ti. ¹⁶ Re in ri ə ra nya kaa, adi ji njiyəi nan'ti toki j'in nu biti ji tei ne kin. ¹⁷ Ngannkon'm'gi, maji kadi ndaji'm'in, ə kadi kum'se in go nja de'gi'ti ki isi njiyəi kigo lo njiyə'gi'ti toki in gəri. ¹⁸ Tado ngayn'gi, njiyə'de ɔsi ta koy Kirisiti dɔ

kagidəsi'ti. Ningə in ta ki m'el'se ki dəkagilo'gi pəti, nan m'təl m'el'se bone bay, ki mann non kum'ti. ¹⁹ In de'gi ki ta tolta'de in tuji, tado luwə lə'de in kanda'de, taa tɔbar lə'de in me nya'ti ki to rɔsɔl'ti tɔ, ningə nya ki uwə me'de, in nya ki dɔnangi'ti ne par. ²⁰ Nan j'in ə, j'in ngannjebe'gi ki dɔran'ti. Dɔran ki in lo ki j'isi ji nginə njekaji'je, Burəbe lə'je Jeju Kirisiti kadi ində'ti to re ingə'je. ²¹ Jeju a mbəl darɔ'je ki tɔg'ɔ goto, ki a oy kin, kadi təl to to darɔ'a ki aw ki tɔji ki əti bɔl kin be. A ra kulə kin ki tɔgi ki awi'n kadi uwə'n nya'gi pəti ginn tɔgi'ne'ti.

4

¹ Ngannkon'm'gi ki njendigi lə'm, m'ndigi ngayn kadi m'təl m'oo'se. Ingi, in nya rɔnel lə'm, in jɔgi kɔsikurə ki isi dɔ'm'ti. Lo kin'ti, njendigi lə'm, maji kadi uwəi tɔgi'se ba to kin be, njiyəi nan'ti ki Burəbe.

Ta kɔji tado kisi ki nan ki lapiya

² M'uwə nja Ebodi in ki Sentisi, m'dəji'de kadi adi me'de in kare me kində rɔ nan'ti ki Burəbe. ³ Nga ningə in madikulə'm ki maji, m'dəj'i kadi ra se'de adi ndu'de osi go nan'ti, tado in dene'gi ki indəi rɔ'de nan'ti sə'm, rɔi tado Poyta ki maji. Rɔi, nan'ti ki Kileman ge ki ndəgi madikulə'm'gi ki rangi pəti ki Luwə ində tɔ'de me makitu kaji'ti.

⁴ Rai rɔnel ki dəkagilo'gi pəti me njiyə nan'ti ki Burəbe. M'təl m'el'se bay, rai rɔnel! ⁵ Maji kadi de'gi pəti gəri ra maji lə'se. Burəbe a re ngɔsine. ⁶ Ningə, kadi adi me'se ra sururu dɔ nya madi'ti el. Me nya'gi pəti ki to rɔ'se, maji kadi indəi non

Luwə'ti, eli si'ə ta, nonyi dɔ'a'ti, ə rai'ə oyo tɔ.
 7 Nga ningə, lapiya lə Luwə ki utə nyagər lə de,
 a ngəm ngarme'se ki mərta'gi lə'se me kində rɔ
 nan'ti ki Jeju Kirisiti.

8 Ki ngəsine kin ngannkon'm'gi, maji kadi
 nya'gi pəti ki in nya ki rɔta'ti, nya ki de'gi piti,
 nya ki in nya ki dana, nya ki ar njay, nya ki de'gi
 ndigi, nya ki de'gi ɔsikurə, nya ki tɔ'a bar, nya ki
 de'gi uləi toji dɔ'ti, ə kadi uwə me'se. 9 Nya ki
 m'ndo'se, nya ki ingəi rɔ'm'ti, nya ki oyi ta'm'ti,
 ki nya ki oyi rɔ'm'ti, maji kadi uni rai kulə. Ningə
 Luwə ki nje kadi lapiya a in nan'ti sese.

Pol ra oyo Pilipi'gi tado nya ki uləi adi'ə

10 Rɔ'm nəl'm ngayn me kində rɔ nan'ti ki
 Burəbe, loki m'oo toji ki taga bone toki me'se
 to dɔ'm'ti. Me'se kin to dɔ'm'ti be mayinu,
 nan tarow ki kadi toji'm'in adi m'gər ə ingəi el.
 11 Nga ningə, m'elta kin be tado nya ki to rɔ'm,
 el jagi. Tado m'in de ki m'gər lo ra rɔnel dɔ
 nya'ti ki to ji'm'ti. 12 M'gər kisi me ndoo'ti, taa
 m'gər kisi me nyakingə'ti tɔ. Me nya'gi'ti pəti,
 ki lo'gi pəti, m'gər kisi me ndann'ti ki me bo'ti,
 me nya tombar'ti ki me nya torɔ'ti. 13 M'asi kadi
 m'dɔɔ me'm me nya'gi'ti pəti ki takul Kirisiti ki
 nje kadi'm togi. 14 Nga ningə, in nya ki maji ə
 rai kadi indəi rɔ'se nan'ti sə'm dɔ kon'ti lə'm.
 15 In Pilipi'gi, inbe'gi gəri maji toki, lo kulə ngirə
 kiləmbər Poyta'ti ki maji, loki m'aw kadi m'inyə
 dɔnangi ki Maseduwann'ti*, Njekawnan madi ki
 rangi ki kadi un nya adi'm tor nya ki m'in m'un
 m'adi kin goto. De'ə, in ingi par. 16 Loki m'in

* 4:15 4.15 2Ko 1.16

Tesaloniki'ti, ulæi ki nya ki m'aw ndoo'ə asi nja joo kare, rai sə'm†. ¹⁷ Ningə in kadikare ə m'nji m'sangi ji'se'ti el, nan m'nji m'sangi kadi kər ramaji lə'se aw ki dɔ mad'a'ti dɔ mad'a'ti. ¹⁸ Ki ngəsine kin, nya'gi ki m'aw ndoo'ə ka m'ingə pəti tɔ nga. M'ingə ki to mbar mbar rɔ'm'ti, nya ki nal'm goto, loki Epapiroditi adi'm nya ki adi'ə kadi adi'm kin. Nya ki adi'm'in kin to to kadikare ki banyinan əti maji, ki Luwə taa, kadikare ki nəl'ə. ¹⁹ Lo kin'ti, Luwə a adi'se nya'gi pəti ki ai ndoo'ə, kigo nyakingə'ti li'ə ki əti bol ki gorow lə Jeju Kirisiti. ²⁰ Ningə kadi kəsikurə in ki dɔ to Luwə'ti ki Baw'je ki dɔkagilo'gi ki dɔkagilo'gi. *Amen!

Kuwə ji nan ki dɔboy'ti

²¹ Uwəi ji njekunme'gi pəti me tɔ Jeju Kirisiti'ti adi'm'in. Ngannkon'm'gi ki in sə'm ne uwəi ji'se. ²² Taa njekunme'gi pəti uwəi ji'se tɔ. Kibo ngayn in nje ki isi rai kulə me kəy'ti lə nje konbe ki boi Sejar.

²³ Kadi memaji lə Burəbe Jeju Kirisiti in nan'ti sese pəti. Ta goto nga.

† **4:16** 4.16 15-16; KNK 17.1; 2Ko 11.9

Ta lə Luwə Kunmindɪ kɪ Sigi
New Testament in Gor

copyright © 2014 Wycliffe Bible Translators, Inc.

Language: Gor

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022

2c67456e-bce1-5ef4-9c95-47d2d9335aa4